


CV de Braniemeekers

Lummel - Nazareth



Maag iech uuch veurstèlle aon de nuie Hoeglöstigheid vaan CV de Braniemeekers, dee euver 't Braniemeekersriek vaan Lummel & Nazareth zal goon regere:



Prins Danny 1e

In de börgelikke stand vaan Mestreech steit heer ingesjreve es;
Danny, Hubertus, Cornelis Bastings

Heer zaog zien ierste levensleech op 25 juli 1981, in Mestreech.

Heer woende en greujde op in Lummel, same mèt Lies zien mam, Huub ziene pap en zien zusters Esther en Danielle. In Lummel ging heer naor de kaksjaol en daonao naor de bewaarsjaol "Op 't Merkenveld". In Mestreech ging heer nao de middelbaar sjaol en deech de MAVO op 't St. Maartens College. Daonao heet heer MTS werktuigbouwkunde gedoon.

Ziene groete en einegste hobby is voetballe. Zien ierste stepkes zat heer op 't voetbalterrein vaan R.K.V.C.L. wie heer 4 jaor aajd waor. Tot heer 'n groot talent waor dat woort al hiel snel dudelek. Heer woord tösse zien 10^e en 12^e jaor zellefs oetgekoze veur 't talentepan vaan MVV. Spietig genoeg bleef 't bij die twee jaor. Wie heer 17 woort ging heer de stap make nao 't op hoeg nivo speulende FC Vinkeslaag. Dao heet heer tot zien 27^e gespäöld. (6 jaor hoofklas en 4 jaor ierste klas). In die periood woord heer ouch oetgenudeg veur 't Nederlands amateurelftal. Heer heet dao sjoen herinneringe aon euver gehawwe mèt wedstrijde tege o.a. Ierland en Ingeland. Tot zien hart in Lummel laog maakde tot heer daonao weer in Lummel kaom voetballe en dat deit heer nog altied zier verdeenstelek op 't ierste èlftal. Tegeswoordeg perbeert heer zien kinnes vaan 't voetballe ouch euver te bringe op de jonger ginneratie, boe onder zien eige keender. Dao neve traint heer de C-jäög vaan IBC'03/RKVCL.

In 2006 lierde heer zien vruiwke, Priscilla Coolen, kinne en toen is de voonk veur good euvergeslage.

Op 24 november 2014 höbbe zie zich 't jao-woord gegeve.

Same höbbe zie twee keender, Dani (7) en Kai (2). Nao zeve jaor in Nazareth gewoend te höbbe, woene zie noe nog neet zoe hiel lang, aon de Nebostraat in Lummel.

In zien wèrkzame leve heet heer versjeije bäöntsjes gehad. Is begonne es kasteleijn in kaffee de Koul. Daonao es magazijnmètwèrker bij Johnsson Matthey en noe alweer 5 jaor bij Janssen Grondverzet en Transport boe heer de lêste 4 jaor es vrachwagelchauffeur zien dink deit.

Vastelaovend viere heet heer aoch mèt de spreekwoordeleke paplepel ingekrege en zit häöm in 't blood. Opa en oma Laurensse stoonte mèt aon de weeg vaan de vastelaovend in Lummel en Nazareth en vaan 't oontstoon vaan CV de Braniemeekers. Ziene petere, noonk Guido, is es ierelid vaanaof de opriechting in 1971, nog altied zier betrokke bij de vereniging en tant Gerda organiseert al 33 jaor de jäögcarnaval in Lummel. Zien mam, Lies Bastings-Laurensse, heet al versjeije kiere gezörreg tot de Prinse vaan de Braniemeekers zich in 'n sjiek prinsepak kóste laote zien aon 't vollek vaan Lummel en Nazareth. Ziene pap Huub, dee oet Ittere kump heet ouch zien ganse leve vastelaovend gevierd. In 1976 woort heer oetgerope es Prins vaan CV de Vreigeleire. Tot hun keender dus door 't vastelaovendsvirus besmet zien geraak maag daan ouch neet vreemp zien. In 2010 woort de jongste dochter, Danielle, oetgerope es Prinses vaan CV de Trampeleers.

Wie veer Danny vroogte of heer Lummel & Nazareth in 2017 veur zow wèlle goon in de sjoen, mer zwoer daog vaan vastelaovend, hoofde heer zich same mèt zien vruiwke neet lang te bedinke. De familie zal zeker gruuts zien op 'n nui generasie Braniemeekers.



Gegeve; 29 jannewarie 2017, door de Kanselierijraad vaan
CV de Braniemeekers

